



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

tiryimiyim@aolima

tir yimiyim

TAPAK 8

Ki tonga ration bener otsüba scheme melatsüla: Arvind Kejriwal

Burkina Faso azüdokshi nung nisung asür 132 jungogo



VOL. XVIII NO. 233 (ADOK 233) DIMAPUR

TENTONÜ (MONDAY)

AAMI (JUNE) 07, 2021

₹ 5.00

Sorkari lockdown ajanga timtem ajururtem yaritsüla: NPF

Dimapur, June 6, 2021 (TYO): Naga People's Front (NPF)-i Nagaland nung nübortem anema alibaren aser rongsenkettsüing atema tebilemtsü abener ta metetdaksüogo.

Nagaland nung Lock-Down maneni aliba ajanga sensakertemi kanga timtem ajurur anungji sorkari parnok atema kechi mapatem inyaka lir ta NPF-isa asüngdang.

"Nagaland nung kechisarena nung jenjang kanga atur saka sorkari iba tebilemtsü atema ola madoker. Külén, anogoshia nisung aika dak Covid-19 puteter aser yimtsüngtem tongogo. Nübertemi rongsenkettsüing tsütsü timtem ajuruba atema sorkari süoki ia bilema mapa meinyakra, nisungtem achiajem mesüi asütsüsa mapang ka

ajurutsü" ta Press Bureau, NPF sangdong nung metetdaksü.

"Alima ajunga asoshi Covid-19 virus ta lendong ya tuluka lir saka kasa mapang nung sorkari pei nübortem ya-tzürä meyutsütsü. Anungji, PDA sorkari nübortem timtem angateta mapa inyaksü akhanger" ta NPF-isa.

Covid wara mapang sorkari senotsü tim mesüi amshiba atema bushisüngdang asütsüla. 2020-21 nungi 2021-22 financial year nung sen aruba aser endokba indang osang tejangja aliba White Paper ka sayutsü atema NPF-isa takhangba agütsüogo.

Talisa, sorkari nübortem dang Covid-19 vaccine indang osang tejangja sangdongtsüla aser vaccine peria agütsütsüla, ta parnokisa ashi.

Assam sorkari COVID-19 wara tasembuba atema renemer

Guwahati, June 6, 2021 (Agencies): COVID-19 wara tanabuba tatemleni aruba ama ajitetba mapang ka nung Assam nung Health Department-i wara tasembuba atema mapa inyaksü tenzükogo.

"Assam health department-i COVID tayongzükba tulutiba ajurutsü renema lir" ta health minister Keshav Mahanta-isa.

"Onoki maparen jelia renema arur. Assam kübok tesem ajak nung onoki mozü ki aser COVID Care Centre lapoka lir. Tang district ajak nung shiranger 500-1000 tashi anioka anepalutettsüsa renema lir. Onokisa tila-tanurtem aser tainlonglongtem atema ICU yanglur" ta Mahanta-isa.

"Taküm September-October meta nungi Covid-19 wara tasembuba tenzüktsü akok" ta NITI Aayog züngsem VK Saraswat-i tawa tu metetdaksüogo.

"Linük nung vaccine agütsüba maparen ulushitsüla. Asenoki junga inyakogo ta bilemer. Covid-19 wara tanabuba nung junga inyakba ajanga kanga ajema kümogo" ta Saraswat-isa.

"Science & technology teyari, oxygen banks lapokba, oxygen supply atema industry aika yangluba, railways, airports aser mitkartem ajanga liquid oxygen belenba inyakyim balala ajanga asenoki Covid wara tanabuba azüoktetogo" ta paisa metetdaksü.

Manipur nung civilian tepsetba atema AR Major ka apu

Imphal, June 6, 2021 (Agencies): Manipur kübok Kangpokpi district nung Hokolbar aonung yimdaklir ka khasetba atema Assam Rifles ketdangsür ka puogo.

Arishi küm 26 tain Mangboilal Lhouvum-i pa tasütsü lia AR Major Alok Sathe tenung tetshi aser iba nungji ajemdaker Honibarnü pa apu.

Mangboilal Lhouvum ya Chalwa nung liasü aser Major Alok Sathe-i pa dak injang khaloktsü.

Iba mapang AR ketdangsür

ya "off duty" nung liasü. Tanur ana tebu Mangboilal ya anogoshi aayanger ka liasü.

Major Alok Sathe ya Assam Rifles indang 44th Battalion nung mapa lezmüka lir aser Gelnel village post commander inyaker.

Iba lendong atalokba sülen yimdaklirtemi Gelnel nung Assam Rifles tesep amak aser AK 47 rifle 2, garitem aser tanga osettem raksatsü.

Yimdaklirtemi AR tesep nungi Major Sathe anizüker Manipur police ket nung agütsü.

COVID-19 Nagaland: 77 dak putet; 160 taneptsü angu; 4 asü

Kohima, June 6, 2021 (TYO): Deobarnü Nagaland nung COVID-19 puteter dang nungibo taneptsü angur timba liasü.

"Tanü nisung 77 dak COVID-19 putet. Parnokji Kohima nung 20, Dimapur o Zunheboto nung tertenetnet (17), Mokokchung nung 10, Phek nung 7, Peren o Tuensang nung anana (2) aser Wokha o Mon nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-isa.

"Maneni tanü COVID-19 puteta alir nisung 160 taneptsü angu. Parnokji Dimapur nung 101, Kohima nung 18, Zunheboto nung 13, Phek nung 9, Tuensang nung 8, Mokokchung nung 4, Wokha nung 3 aser Longleng o Peren nung anana (2) lir" ta paisa metetdaksü.

Tanü puteter tem züngsema

COVID-19 puteter ajak agi nisung 22,773 kümogo. Maneni, nisung 16,974 taneptsü anguba ajanga 74.53% kümogo, ta Dr Kikon-isa ashi.

"Tang anepalurtem rongnung nisung 204 dak tera shirangba yimya lir, 74 tera shiranga oxygen agir, 30 kanga mejungi oxygen agir, 16 ventilator medeni ICU aser 8 ventilator nung lir. Nisung 4,401 dakbo shirangba yimya kecha mali" ta paisa metetdaksü.

Deobarnü COVID-19 puteta alir nisung 4 asü. Parnokji Dimapur nung 3 aser Zunheboto nung ka liasü. Tanü asürtem züngsema nisung 426 süogo saka nisung 14 bo tanga tashidak ajanga asü, ta Dr Kikon-isa metetdaksü.

Nagaland nung COVID-19 puteter nisung 641 tashi tanga state temi ogo, ta paisa shisem.

Tang tashi nung Nagaland nung COVID-19 alitsü akok ta

temolung melemi bilemba sample 1,989,365 tendangogo. RT-PCR ajanga 91,743, TrueNat ajanga 56,925 aser Rapid Antigen Test ajanga 50,688 tendang, ta Dr Kikon-isa ashi.

"Honibar tashi nung nisung 2,33,604 nem COVID-19 vaccine indang dose 2,87,838 agütsüogo" ta State Immunization Officer, Dr Ritu Thurr-ia metetdaksü.

Vaccine agirtemji frontline workers 58,846, healthcare workers 15,596, arishi küm 45 ser temapur 1,24,154 aser arishi küm 18 nungi 44 tsüngda alir 35,008 lir, ta paisa ashi.

"Nagaland nung vaccine agirtem rongnungi nisung 54,234-i dose anaprong agiogo. Parnokji frontline workers 28,025, healthcare workers 10,199 aser arishi küm 45 ser temapur 16,010 lir" ta Dr Thurr-isa ashi.

Northeast Twitter storm: NCERT-i telangzüba agütsü

Guwahati, June 6, 2021 (Agencies): National Council of Educational Research and Training (NCERT) curriculum nung Northeast tesem indang enoksemsüla ta Northeast state tem nungi kaketshirtemi Twitter nung shilem agiba sülen anogo ka lir NCERT-i telangzüba agütsüogo.

NCERT-i 2016 küm 'A book on North East India - People, History and Culture' ta ser adoka

lir. Maneni, NCERT indang class VI, VII, X aser XII Social Science Textbooks nung North East dak sendakba lesson tem lir, ta Honibarnü NCERT-i metetdaksü.

NCERT-i adokba kaketter nung North East state tem indang peria dang enoksema lir, ta parnokisa ashi.

Taoba hopta Punjab nung alir YouTube kati kin nung ajemdaker mezüngmeshiba sülen

June 4 nü Twitter nung hashtags #AchapterforNE aser #NortheastMatters ajanga NCERT syllabus nung northeast indang putiotsü aser sobaliba tapaktem enoksemsüla ta nisungtemi takhangba agütsü.

Iba Twitter storm ayongertemi Northeast nung professors aser shishashirtem den asüngdangteper Education Ministry nem memorandum ka agütsütsü sentong renemogo.

Tanü World Food Safety Day amongtsü

Dimapur, June 6, 2021 (TYO): Alima den külemi June 7, 2021 nü Department of Health & Family Welfare, Nagaland-ia 'The World Food Safety Day' amongtsü.

Iba anogomong ya Food safety division ajanga 'Safe food Now for a Healthy tomorrow' omen nung ajemdaker amongtsü.

Iba omen ajanga chiyungtsü tajung yangluba aser achiba ajanga nübortem, alima aser rongsenkettsüing nem tajangzük bentsür arutsür ta asüba nenshir. Meimchir, shiruru, süngdonglidong, lipoküm aser

rongsenkettsüing sendaktepba ajanga tarutsü nung asen nüngdakbatem peritsütsü, ta tanü HFW department-i sangdong ka nung metetdaksü.

Küm shia India nung food borne diseases (FBD) million 100 shi ajurur aser iba atema kümshia linüki \$15 billion endoker. 2030 küm tashi nung küm shia nisung 170 million shi akümtsü ama imlar aser nisung 12 nung kabosa shirangtsü. Chiyungtsü ajanga temang nung timtem bentsür aruba ya public dak dang masü saka linük rongsenkettsüing nunga kongshir, ta parnokisa ashi.

Nagaland nung Food safety division-i Enforcement and the Analytical wing ajanga Food Safety and Standard Act 2006 (FSSAI) mapa küma inyaker.

Food safety division ya government level nung Principal Secretary (Commissioner, Food Safety), directorate level nung Principal Director (Addl. Commissioner, Food Safety), Director (Health), Addl. Director, State Program officer, Assistant Commissioner (Enforcement) aser Technical Officer (Analytical) ketdangsüba nung mapa inyaker.

Northeast nung June 10 tashi tzünglu kanga arutsü

Guwahati, June 6, 2021 (Agencies): Northeast India nung June 10, 2021 tashi tzünglu kanga arutsü ta India Meteorological Department (IMD)-i metetdaksüogo.

Sikkim, Arunachal Pradesh, Assam, Meghalaya, Nagaland,

Manipur, Mizoram & Tripura Hombarnü Assam, Meghalaya, Nagaland, Manipur, Mizoram aser Tripura kübok tesem aika nung tzünglu kanga arutsü ta IMD-isa.

June 8 nü Sikkim, Arunachal Pradesh, Assam aser Meghalaya

kübok tesem kar nung tzünglu kanga arutsü ta parnokisa ashi.

Maneni, June 9 nü Sikkim, Assam aser Meghalaya aser June 10 nü Assam aser Meghalaya nung tzünglu kanga arutsü ta IMD-isa metetdaksüogo.

Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aitsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzü aser juice jemang. Pei meyong mobile phone, kumesü aser toothbrush nung ama melentepa tamshi. Mozü achitsü agütsü lira, aji shitak chiang. Tango junga mesashitba, teku ashiba, aketba aser temang metaba timtem lira yakta doctor bushiang.



Tir Yimiyim

Mulungnen O

C.IMTINUNGSANG NOKDIR
26:07:1930 – 31:05:2021

Ozü temeim kinungbo aser tsürabur asür **C.IMTINUNGSANG NOKDIR** iba lima nungi pilaa orr onok mangyim jashi nung alidang, onok dang meima sarasademtsür aser yaritepertem ajak den onoki kanga pelaba lemsateper.

Iba ama timtem mapang nung, nenoki onok tashi aser tasü itdakja mulung anisüngzükdaksüba teyaritemji kanga tulu liasü. Pa taküm nung tajung bilemteta onok den yaritepba asoshi nenok ajak dang onok bang agi meshitetba tepela tulu metetdaksür.

Tsüngremi nenok ajak talubosa moajangma ta onoki sarasademtsür.

- Temeim Kinungtsü, chirnur, anükapang aser semchirtem.

**SHIRNOKI INDANGINDANGA JAJAR PARNOKJI TESÜNEPDAKI AOTSÜ;
TASÜBAJI PARNOK ASOSHI ANISÜNGZÜKDAK ASÜTSÜ.
ISAIA 57:2**



NDPP ajanga asükhulemsatep
Dimapur, Aami/June 06 (TYO): 36-Satakha assembly constituency nung NDPP secretary, Kahoshe ajungbena Zunheboto nung June 04, 2021 nü asüba osang angashia aoksar aser kanga sasar, ta NDPP tir, Chingwang Konyak ajanga sangdong ka nung ashi.
Pa asüba ajanga tawa tuluka adokogo aser pa asüba ya Satakha nung aliba nübur aser talisa NDPP asoshi takoksa tulu alitsü, ta ashi.
Kü den NDPP züngsem ajungai asür kibong den mangyim tejashi lemsateper aser mangyimer nem tesunep aser tashi agüjang ta sarasademtsür. Asür tanüla teti tatem maka tesunep nung anisüngzükjangma, ta NDPP sangdong ajangasa ashi.

NBSE ajanga Fit India Quiz atema metetdaksür

Dimapur, Aami/June 06 (TYO): School tanurtem rongnung temang anema ayuba aser saisapong indang awareness adokdaksütsü mechi Sports Authority of India, Ministry of Youth Affairs and Sports kübok Fit India Mission ajanga linük tesem ajunga nung aliba school tem atema June 2021 nung Fit India Quiz agitsü lemtetogo, ta Nagaland Board of School Education (NBSE) sangdong ka ajanga ashi.

Temang anema ayuba aser saisapong indang shisatsü sayutsü atema National jenjang nung kaketshirtem atema sapang agütsütsü aser küm noklang aika tejeng indigenous sports, taoba national aser regional sporting heroes aser India nunger akhi yimya nung aliba ajanga ajak atema temang anema aliba nung tongtipang shilemtem densema kaketshirtem tekolok nung India nunger saisapong tsütsü

puti otsü taka-tait indang menüngoktsütsü nükjidong nung iba quiz ayongzüktsü sentong ya yanglu.

Iba quiz ya kaketshirtem asoshi National-Level Quiz mezüngbuba alitsü, kong ajak senteper senpet sen crore 3.25 school aser kaketshir nem agütsütsü. Iba sentong ya Star Sports aser National TV channel tem nung sayutsü.

Round pezü aliba quiz nungya tsünglanglen agüja alibatem adentsü:

School Round: Preliminary Round atema kaketshirtem tenüng züluoktsü asoshi school-i agitsü.

Preliminary Round: National Testing Agency (India nung JEE aser NEET amala national-level tatidang agiba examination body) ajanga multiple-choice online round agitsü. Linük ajunga nung iba quize ya regional-medium school tem nung azünger ajangzüktsü asoshi oshi 13 nung

ayongzüktsü.

State Round: Preliminary round nung qualify sür aliba school tem rongnung State/UTs ajanga FIT India Mission teyari nung agitsü. School qualification atema yimya tejangja annexure nung rasaa lir. Iba round ya quiz master takoteti ketdangtsütsü aser social media nung webcast asütsü.

National Round: Final round nungya State/UTs shia nungi takoker teloki shilem agitsü aser FIT INDIA QUIZ 2021 nung National Winner atema tokteptsü. Tanabuba aser tasembuba jenjang angurtem atema senpet agütsütsü lemtetsü.

Iba ya sentong tuluka alitsü, koba Fit India Icon temi ayongtsü. Anungji züluoka aliba reju tekolakpur dang iba sentong takok angutsü atema pei school nungi kaketshir timtibai shilem agütsüsa osang sangdongtsü metetdaksür, ta sangdong ajanga ashi.

Nagaland Adventures Club ajanga frontline worker ajungmeso



Dimapur, Aami/June 06 (TYO): COVID-19 tashidak wara ya ajanga lenla aisü nung timtem aser tetsükdaksü agüja arur aser healthcare system nem khuret onsara agütsür. Ajisüaka healthcare aser frontline worker temi iba virus azioktsü asoshi maneni par takum aser mapang agütsür inyaker, ta Nagaland Adventure Club ajanga sangdong ka nung ashi.
Frontline worker temi asenok

takum kumzüka ayutsü mechi pei takum kisüing masü saka kibong aser kinunger adianutem densema takum lendongbang nung yutsür tepang agi meshitetba timtem ajurua mapa inyakba angudang state den külemi Nagaland Adventure Club ajanga kangasa pelaba lemsateper, ta ashi.

Parnoki akokba yari aser tashi ajunga agi asenok asoshi iba tashidak den rarar ta angateta

asen molung anisüngzüker.

Parnoki nüburtem tenzükba asoshi tepela sayuba temaitsü aser timtem mapang onoki akokba yari tepela lemsatepa, aser parnok ajungmesoa Nagaland Adventure Club ajanga COVID-19 hospital ta shimteta aliba Naga Hospital Authority Kohima aser District Hospital Dimapur nung inyaker nem chiyongtsü agüja liasü, ta sangdong ajanga ashi.

MOKOKCHUNG DTF COVID-19 IMPORTANT PHONE NUMBERS

Medical Control Room

9856087076
7628854582

Covid-19 Hospital

8119041793

Flu Clinic

8794904054
9362562104

Covid Care Centre

7005643192 / 9862324202
7005179769 / 9890962231

DTF Covid-19 Helpline

8131836575
7005099639

Cemetery/Crematorium

9366926238

DTF Covid-19 High Risk Contacts Helpline

7005032626 / 8413886248
8731820163 / 8787512760

DTF Ambulance

9362561926

Tuensang Police-i senotsü sarur nisung pongu apu



Dimapur, Aami/June 06 (TYO): Tuensang district kübok sorkar indang department aser danga business tem nungi ozüing alema senotsü saruba indang kuli tejangja alir nisung pongu tashi Tuensang Police ajanga pua liasü.

Telungpur telok balalai district telungzük nung ozüing alema saru meshiba lir, ta osang tejangja kar aser tawa police station nung 'feedback boxes' inoktsüba nung inokja aliba ashishitepba osangtem nung ajemdaker Superintendent of Police Tuensang, Amit Nigam, IPS ajanga DEF nung sepaitem nem osang sangoktsü aser SDPO Tuensang dang nüburtem timtem jangjatsü totuyuba agüja liasü, ta

sangdong ka ajanga ashi.
Yamaji SDPO Tuensang kübok crime branch indang anti-extortion unit nungi team ka dang Tuensang district kübok ozüing alema senotsü sarur aser tashiyim amshia meshirtem aputsü atema tasa yanglutsü nungloktsü.

Iba mapang parnoki nisung pongu apu aser parnok kabu nungi Tuensang district kübok sorkar indang department aser danga business nungi ozüing alema aser tashiyim agi senotsü meshiba kulitem nguteta liasü.

Pua alirtem anema Police Station Tuensang nung ozüing tapet kübok ken o züluoka bushisügangba mapang lir, ta police temi sangdong ka ajanga ashi.

NGO temi tzümet süng agi kongshiba yimtem nem rong agütsü



Jorhat, June 6, 2021 (Agencies): Assam kübok Lakhimpur aser Majuli district tem nung tzümet süng agi kongshiba yimtem yaritsü atema NGO balalai rong lema agütsüogo.

Sorkar department aser agency tem dak alia Non-Governmental Organisations (NGOs) aikati Lakhimpur aser Majuli nung tzümet süng agi kongshiba yimtem yaria arur.

Deobarnü People's Action for Development (PAD)-i yim 5 nem 'medium-size country boats' pungu agütsü.

PAD-i inyakba mapatong ya Germany nung Terre des

Hommes (TDH) ajanga teyari agütsür.

"Tanü Majuli kübok Salmara nungi rongtem bener oa yimtem nungi VDMCs ket nem agütsü. Parnoki teyari agütsüba atema pelaba shiogo aser onokia parnoki amalitepba atema pelar" ta PAD deputy director, Philipson Sona-i ashi.

PAD-i rong agütsüba yimtem- Aunibari, Bholukaguri, Gondhosariati, Purani Bahgarha aser Dhunaguri.

Taoba hopta Indo-Global Social Service Society (IGSSS)-i Lakhimpur district kübok yimtsüng 15 nem rong 30 lema agüja liasü.

"HDFC Bank nungi teyari agia corporate social responsibility (CSR) kübok onoki rong agütsü" ta IGSSS project manager, Dharani Payeng-i ashi.

Jorhat nung amenoka aliba NGO- North East Affected Area Development Society (NEADS)-ia Majuli district kübok yim 5 nem rong 5 agütsüogo.

TDH-i yarıba mapatong nung Brahmaputra ajanga tzümet süng timtem bentsür aruba yim 10 nungi VDMCs nem VDMCs kits aser search & rescue materials agütsüogo, ta NEADS project coordinator, Hemanta Phukan-ia ashi.

Mizoram nung tanur 46 dak Covid-19 putet

Aizawl, June 6, 2021 (Agencies): Mizoram nung Deobarnü tanur 46 dak tema densema nisung 267 dak Covid-19 positive putet aser parnok züngsema nisung ajak agi 13,567 kümogo.

Honibar aonung Zoram Medical College (ZMC) nung arishi küm 92 tain tambur ka iba wara ajanga süogo. Tasüsang ya Kolasib district nungi lir. Mizoram nung Covid-19 agi asür nisung 53 tashi kümogo.

Honibarnü sample 2,886

tandangba nungi sample 267 nung Covid-19 aliba puteta liasü.

Tashidak tasen puteter rongnung Aizawl district nungi nisung 202 aser tanünga 65 ji Kolasib, Champhai, Siaha, Lunglei, Lawngtlai, Saitual, Mamit aser Serchhip district tem nungi lir.

Covid-19 puteter ana tashi ainlen senzüba osang lir aser tanünga nisung 265 ji pei pei aliba tesem nung menaba (locally infected) lir.

Parnok 265 rongnung nisung

84 indang 'contact history' ano meputeti lir, ta ketdangsurtemi ashi.

Tang Mizoram nung nisung 3,363 tashi anepaludar aser nisung 10,151 iba wara nungi taneptsü nguogo.

State nung Covid-19 nungi taneptsü angur 74.83% lir aser iba tashidak agi asür 0.39% alitsü.

Mizoram nung COVID wara agi kongshiba sülen tang tashi nung sample 4, 09,868 tendangogo.

CM Biren-i Covid care centre tem semdang

Imphal, June 6, 2021 (Agencies): Manipur chief minister N Biren Singh-i Honibarnü Imphal kübok Manipur University telongtet nung teyangludak aliba yipden 300 aliba Covid care centre semdanga liasü.

Imphal nung iba amala centre balala nung Covid-19 agi shiranga amongertem yarıba maparen pungbadaktsüsü ta CM Biren-i ashi.

Iba centre tasenba ya taruba hopta nungibo maparen inyaktsüsa renemtsü sentong lir.

Kasa anogo, chief minister Biren-i Imphal district kübok Canchipur tesem nung yipden 60 aliba Covid care centre ka lapoktsü.

Iba Covid care centre nung tanurtem densema Covid-19 agi shirangertem anepalutsü.

Covid-19 positive puteter

tanurtem anepalutsü asoshi iba center (Canchipur) nung yipden 60 nungi yipden 30 tashi yua lir.

Tesüiba ghonda 24 tsüngda Manipur nung nisung 717 dak Covid-19 putet.

Kasa mapang, nisung 9 tashi iba wara ajanga asü aser parnok züngsema tasür ajak agi nisung 872 kümogo.

Ano külen, Manipur nung nisung 9,016 anepaludar.



Guwahati nung Lions Club-i Deobarnü Gokul Homes nung alir yaritepertem (house helpers) nem dry ration packets 150 jungnüa lema agütsüdag agiba noksa anur. Sorkari latetba COVID-19 inyakyim sülen anidaka ration packets lema agütsü. Packet shia nung jang, dal, totzü, alo, soya bean, shini, metsü aser sapon den mask dena lir. Lockdown ajanga sensakertem mapa inyakdak mengui timtemba nung yariteptsü atema Lions Club-i iba mapa inyak. Hopta ishika tejaklen Gokul apartment nung security guard ka tebu asüdag idakji alirtemi Rs 26,000 sarutener teyari agüja liasü. (Guwahati, June 6)

PELABA LEMSATEPER

"...Kibubai agütsü aser Kibubai bener ao; Kibuba tenüng moajang" -Yob 1:21



Onoki meima aliba asür **IMYULANGBA LONGCHAR** (Anokpu) pa mapang tatsüka shiranga alidang aser pa asüko mapang CIHSR nung doctortem, nursetem, stafftem aser City Clinic nungi Dr. Talimoa Longkumer, Kiyonger, Yimtsüng balala Councils, Arogotem, ABAM, lokti tentet balala aser temeimertem teyari balala agütsüba atema onoki temulung ajunga agi pelaba lemsateper.

Ajak Takoksang Tsüngremi nenoki onok dang temeim sayuba atema nenok ajak moatsüsü onok sarasadem.

~ Temeim chirnurtem, kinungertem & adianutem.

Piles Cure Centre - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **H. Umar Chesam contact no.8416087414 / 7627998690** Address: Burma Camp 2nd Police point opp. tetuyuba nung anidaka surgery kecha magii (non-surgical) anepaludar anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. Time: 7 AM - 3 PM -Yours sincerely -Achela, Add: Mokochung

Kaziranga National Park shilem kar tzü agi metsüngbangogo

Guwahati, June 6, 2021 (2021): Brahmaputra ayong den tanga ayongtem nung tzü mesemi akümba agi Kaziranga National Park (KNP) kübok shilem kar tzü agi metsüngbangogo.

Iba National Park nung arem shirururtem ali takong/tenem bushia National Highway 37 ajangdanga aoba nguogo.

Gari kanga kara aniba ajanga shiruru tsüksetba azüoktsü atema Nagaon district nung Kaliabor sub-division administration-i garitem senzütsü atema tenokdangba agütsüogo.

Amguri nungi Bagori tesem tashi aser iba tesem ana ajanga süia aoba highway densema

CrPC Section 144 (1) agütsüogo.

Iba tetuyuba nung garitem 40 kmph dak tema anitsü memelar aser nisung pungo tashi dang adenshia kazütsü memelar.

Ano külen, dhaba mesüra restaurant kima nung gari tulu anena ayuba aser item tesem nung aonung meta kuli tejangja kecha melii gari tilatem anenba mesüra horn agütsüba inyakyim ajak nokdanger, ta administration-i metetdaksüogo.

Ajisüaka, police, security forces, forest officials aser COVID duty personnel densema emergency service tem iba tetuyuba kübok madaner.

Tripura police-i journalist amakba ken o 24 benoka lir

Agartala, June 6, 2021 (Agencies): Tripura police-i taküm June 5 tashi nung tesem balala nung journalist dak teka sangshiba atema ken o 24 benoka lir.

Tatalokba 7 tashi taküm atalok aser 17 ji yaküm atalokba liasü.

"Media kar nung journalist tem dak teka sangshiba kanga bulur aser police-i aibelenertem dang kecha mashir ta osang sangoktsüogo" ta Assistant inspector-general of police (law and order), Subrata Chakraborty-i ashi.

Honibarnü Director general of police-i district balala nungi superintendent of police tem den senden ka amen.

2020 nung journalist dak

teka sangshiba atema ken o 17 aser 2021 nung ken o 7 benoka lir, ta police-i metetdaksü.

Police-i ken o 16 atema chargesheet benokogo aser ken o asembo olemtepa angatettepogo, ta parnokisa ashi.

Tatalokba kar nungbo nisung majitet lir aser item nisungtemji police-i jangjatsü bushitepdar. Tang tashi nung nisung 15 indang maitsü jangjaogo.

Ajisüaka, Assembly of Journalists (AoJ)-i ashiba agi tatalokbaji iba dang nungi anasü agi timba lir aser yaküm September ita Tripura chief minister Biplab Kumar Deb-i media kar amokmerenba sülen nungi timba ataloker.



TIR YIMYIM YIMOBILEM (EDITORIAL)

DIMAPUR TENTONÜ, AAMI(JUNE) 07, 2021

Kangabo mepusateptsüla !

Asenok alidak tesem aika nung tang ya Covid-19 tashidak mesen keta aliba putetter, iba jagi asenok kanga pusateper (panicky asür), saka asenoki metettsüba kaji, tsübutepa mesüra pusabulema pei alidak telemtetba agiba jagi tang maparen aika nung meteta aser memeteti takoksa angutsü. Atangji, iba tashidak agi mejungi tongdaksüra asür, anungji tetsübuttsüka saka tashidak tsübuba agi asenoki tashidakji makoktsü saka metsübui asenoki tashidak den raraba sübotsü shitak sübur raratsü tim. Aji oda, iba tashidak den raratsü asoshi mozü kidang inyaker doctor aser nurse-temi anir nisung ajak asoshi sübotsü renemja lir. Item sübotsütemji mozü kidang inyakerkem asoshi tekojung nungi temesüla tashi nembanga süoshi asemtsü aser teni tebang aser teka temeyong ajak meyipanga mask aser glove semoker shirangertem anepalutsü aser nübortema pei mapa inyakdak aser kima tangar alidak anasa aotsüsa kümra, teni tebang nembanga mask agitsü aser teti sapon agi teka shidoktsübaji Corora tashidak anema raratsüba sübotsü aser teinyaktsü mapatem lir. Aji oda, asen dak corona tashidak putetra, mesümgangtsüla aser metsübuttsüla, kechiaser alima nung maliba tashidak ka asen kisüng dak atemer masü saka Corona mesen yagi alima süngogo, anungji memetetika asen kümdanga aliyonga menatsü akok saka tashidak putetli asen kidang asenoksasa chiyongtsü tatsük talem aser doctor-i agütsüba mozü agi anepalura corona tashidaksa temelaba aneper. Asenok dak tashidak putetbaji tendangba agi putetter, anungji tashidak tendangertemi pei mapa nung kanga temulung agüja inyakdagi ta asenoki pelaa bilemdi. Ano, asenbo meshiranger, anema lir ser nung asen dak putetbaji Tsüngremi meimba agi asen dak tashidak mesenbo lir ser nung, shirang metenzükdangyongi tashidak anepadoktsüsa taochi agütsüba mapanga ta metetdi. Aji oda, mozü kidang inyakerteri raraba süoshi shitak agir shirangertemi anepalura aser nübortemia tashi angaa kima yimdong nung nungdak mali ser akhidang ama telok telok kazülongzua mesenzütsü saka kanga nungdakba mapangang kimai adoktsü aser idangjia teni tebang nembanga mask agitsü aser tangar den tepila yur inyaksangshira, asenoki memetetika Covid tongpang ya koker alitsü. Kena Covid wara aruba yagi, asenok amajok nung mapang endoka senzüba to anendaktsüogo aser hopta nung tejaka kena memeyi senzürtem to anogo nung asembeben pezübenbo tejak teben ajak sapon agi shidoktsü aser anogo shia tzü chigutsü aser tzü chigu shia süoshi melentsü aser süoshitemji nangdena meyui melenzükli shidoktsü, chi mapang shitak nung tatsük talem chiyongtsü aser temang tashi itta alitsü atema süngjanglijang, aonsutsü aser chiyongtsü tajung bushia achitsü aser kazüa dang melii temang arakzüdakja mapa inyaktsü ta asütsüsa yimya tajung akümtsüba sobaliba maparen tajung aika inyaktsü sayuogo. Aji oda, Covid putetba agi Covid tsübua ki shibanger amokba kija agibo Covid tashidak menokdangtetsü. Yimti süngküm shibanger kidang ashibanga mongtepdi asüyonga, asenok rongsen aser temang jenjang agi kopiga mongtetsü ? Ibaji mozü kitem renemtsü aser asenoksasa asenok temang anepalu ashitsü atema mapang tatsüka agiteta agir amai lir. Iba ama tashidak wara agi asenok amokmerendang, asenok teinyaktsüji mozü agitsü, raraba sübotsü sübotsü aser medical nung mongintemi kechi sa inyaktsü shidir, tashi angaa parnok sülen anidaktsüba mapatemji kanga tongtibang asütsü. Asenok ya sür külen yariteptsüba masü saka masüdang metsübutepi temeim agi yariteptsübaji, tang ama mapang ya balaka, kanga tongtibang kümogo. Asen lima nung Covid tashidak kanga putetter süra asenokbo khen süngjemshidi aser mozü ki renemtsü purtemi yakta yakta mozü ki ajak zep ta renema yuang aser nübortemia government-i agütsüba tetuyuba sülen shitak anidaktsü merangdi. Government-i agütsüba teinyaktsütemji odang agütsür masü saka medical nung mongintemi ashiba teinyaktsütem lir. Itemji mozü dang nungi tajungba, anungji mozü kidang monga mozü achitsü melena, mozü mechidang, Corona akoktsüsa senso ajaki tashi angatepdi.

OLEMSABANG

KHRISTAN KIBONG NUNG KILIR KODA AYUTSÜ ASER ANEBALUTSÜ?

~ Ms. Sashikümla Longkümer

(Yashi adok nungi...)

Aor kibongtem aika nung kilir tim mesüi yua lir. Asenok memelenshira tangari sendoktsü aser aiatai tia ajurutsü. Temulung shirangtsü otsü aika lir, saka tatishitsü ka-ana dang shiner. Tenzüker tajung kati yamai ashi, "Ni ABAM mission field Wancho, Arunachal nung aliba mapang ajuruba ka: `Wancho nunger tanur aika school züngdaksütsü, tajung kümdaksütsü ta shir asen Ao limai anir ao, saka timtem marem tanur karbo jena aruatokba ni ajuru. Parnoki ashi, nenok Aorsa tamajungba ta sür parnokki ajuruba timtem aika ashi aser karibo onoka mezüngmeshi. Ni aliba kiburjibo mojing" ta ashi. Ano Pastor kati yamai zülu, "Townulu nung asen Aor jenti alidak alir asünung ni tenük agi kilir tim mesüi ayuba jenti nguogo. Aortem temoatsü makai akümba ya kilir mechi nungia ta bilemer. Hau, aikati junga amshir, saka aikati shiruru jenjang nung doktsü aser shiruru dak azüker ama azüker. Pei azübo kanga anebalur, saka nisungbo anebalu masür, azü ayipdak yipdaksür. Ni sannüker ka ama, tanur ya school züngdaksütsü anir aru süra pei chir azüngba school nungji züngdakjang ta taka taiter aika dang shiogo, saka yamaji meinyaker. Süoshi magütsür, khen khenbo schooli meyoker, kaket peria malitsü, tiffin renema bener meyoker. Khen khenbo kiburi oset misplaced süa yur, auür tongja tejashi ajak senema temang ajunga nung stripe adoka azükba nguogo." Ibaladangji atakatem mapa ta ajar. Koda temulung shirangtsüka. Iba amai dang kilir dang inyak nungbo Tsüngremi atangji Aor merenshitsü. Arogo tenzükeria kasa, mesüra tamajungba kilir anema inyakba otsü lir. Shitakba tatalokba otsü ka: "Arogo/Mungdang nung tenzüker kar kidang Eastern Naga kin nungi asangur ka kidang yaritepa alitsü aser taah-ji school zünga tajung kümdaksütsü ta sür anir aru. Tanubosangji kanga okrongseta ali, chi mapang shitak nung magütsü, chisüng dang chiyung, chi surobaji Tenzüker kibong jagi chiyungmar tanubosang nemji khen khenbo kecha magütsü; süoshi tajung keta mesemdang, tsüngsemji pa asoshi pongmang nung akshi den chiyunger ama, saka timtem arema pai kiburji tenzüker class 10 pass sür par limai meyipa ao. Küm ishika lir arogo nung Tenzüksangji tanubosanger yim len Revival agütsüi aotsüsa aküm. Tesümgangtsüka sayutsüngi saka tanubosang jagi pa koma amshi, koma merenshia alaashia yutsü iba indangji par nüburtem dang kodang ashi, Tenzüker tajungji maakser meyipa aru. Pastorba/Revival speakerba kibong noksaji kanga jangratemtsükabo mali asü. Tsüngrem tenzüker kibong ama tilaketa tanubosangi majitet." Yangi mapa aser sayutsüngiba meputetba aser taküm kuli ajanga mesayutetba sayur. Mapa metenra tamangji tasü ta metetdi. Kasa mesükba tatalokba lenir kati yamai zülu, "Tsüngrem tenzüker kidang yariteptsü ayuba nisung mechi-mejemi toktsüba dang masü, tashi mangarji ta sür tenarong tutsüba nguogo". Tajung kümdaksütsü ta shia anir arua ayutsü, saka exam mapang nunga sünga lesson azüngtsü mapang takta magütsür, shirangdang anebalutsü melena "azümasen" ta jaa merenshia mapa inyakdaksür. Asen chir dak kilir dak inyakba amaji tangar kiburi inyak nung naia koma bilemtsü? Nai temulung shiranga nüksü alua ajepsü. Aori kilir dang benshiba ngua tangar ajeper. Tsüngremi parnok tajaba ola angashitsü aser Tsüngrem ain adoktsü. Hoi, Aortem ner kidang kilir koma yua lir, khen shisadangtsü mapang. Neri meima anebaludar ma? Nungdakba agi kilirji kidangi anir aru. Koba nükjidong, koma jembir anir aru yamaji inyaktsüla:

- 1) Taah agütsütsü ta shir anir aru süra, ozüngi melala ama tim taah agütsütsüla, saka India temzüng anema child labourer mayutsüla.
- 2) Schooli yoktsü, training agidaksütsü ta tangatetep nung anir arua lira, agi shitak inyaktsüla
- 3) Account nung security doktsütsüla
- 4) Parnok sobaliba mezüngmeshi masütsüla; Aor tenüng agi memelentsütsüla
- 5) Parnok dang tarutsü nükjidong sayutsüla
- 6) Sobusolemtsü aser chiyungtsü peria agütsütsüla
- 7) Tim leman nung metongshia anitetsüla
- 8) Sentep senchi nung shilem agia tendaktsütsüla
- 9) Libaliro tajung nung anitetsüla
- 10) Kotak leman sayutsü

Itemji meinyaktetra kilir ayuba jagi asen dang atakatem arutsü. Temeim mapa ajanga dang kin ka ajungketer and temoatsü bener arutsür ta angatetdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Odisha state nung Hindu nungertemi Tenla ki ka raksatsü



Odisha nung Koraput kübok Bodaguda yimdak Tenla ki raksaja aliba noksa nung angur.

June 06, 2021: Yaküm July ita nung Odisha nung Koraput kübok Bodaguda yimdak Hindu nungertemi Khristantem amak aser parnok amokmerenba sülen tawa Hindu nungertemi maneni yimdak Khristantem Tenla ki raksatsüogo.

Yimdak Khristantemi parnok akaba ayokba sülen iba sen jagi taküm February ita nungi Tenla ki ka yanglu tenzuka liasü, ajisüaka tawa contractor temi Tenla ki yangluba renemtsü lia Hindu nungertemi tenük yoka liasü.

May 16, 2021 nü yimdak nungi dang masü saka anasa aliba yim nungia Hindu nunger 100 dak tema adenshiba sülen Tenla kiji raksatsüogo.

Yimdak lenir kati iba Tenla ki project manager, Deba Bhoi dang, "Iba tesemi shiba arudir onoki metepseti ali nung taküm aremstü," ta amokmeren.

Iba Arogo nung pastor-i police nem First Information Report (FIR) agütsüba sülem police ketdangseri yimdak Hindu aser Khristantem ajak jaoka iba ken o külemi

benetstü metetdaksü.

Yimdaklir Hindu nungertemi yim anasa Tenla ki yanglubaji ashishia, "Parnoki (Khristantem) yimdak nungi kilometer 2 pilar ang Tenla kiji yanglutsü akok," ta ashi saka Khristantemi ibaji magizüker.

Khristantemi, onok li nung tekülem agitsü atema Tenla ki yangluba nokdangbaji onok temeden anema inyakba lir, ta ashi.

Tang tashi nung police-i Hindu nunger shinga anema ken o mebenok mesüra Tenla ki raksatsürtem shinga mapu.

ANOGO ABEN TSÜNGREM DEN

CHUBA PUTIRTEM

Nenok teshimetetba kin, chuba putir telok, temeshi kin, aser Tsüngrem pei agitsü purtem nenok lir.

1 Peter 2:9

Na Khristan ka, süra na Tsüngremi shimtetba putir ka lir. Chuba putir ka ama na maneni chuba dangi aotsü leman lapokja lir. Ne taküm nung nüngdak adokra, na atema tetsüngdai air putir ka bushitsü menüngdak. Na chuba putir.

Aji oda süaka putira, pa mapa lir. Putir inyakyim kübok putir kati putir mapa inyaksüla. Laishiba nung putir kati kija inyakyim amshitsü shia mali, pa balaka tenzükba mapa mali. Putirtem külemi mapa inyaker (Lev. 9:1). Lairen masüba kija mapaji Tsüngrem putir kübok pai bilemba mapa nungi pilatsü akok.

Nübur matsüngdang putirji Tsüngrem melen noktakba lir, saka pai ano Tsüngrem dangi nübur tebilemba abener. Na meketa kar Tsüngrem dang mepishitsütsü putir sarasadem nüngdaka lir asü? Karbo ne taküm nung Tsüngrem angu nung dang Tsüngrem metetta arutsüba alitsü akok. Khristaji shidakba taküm lir ta pa nübur taküm agi sayuba alimai nüngdaker. Tsüngremi ajaba dang nungi asen mapa temaba südaktsübaji lendong lir. Asenok mezüngbuba putir asütsü aja, aser tanabuba mapa ka nung sotdaksü aja. Kodang asenoki ibai meinyaklir asen meketa alir ajaki asenok ajanga Tsüngrem dangi aotsü songtemtsü. Tsüngremi secular mapa kati ajatsü akok, saka iba dang nungi talisa na Pa putir ka asütsü shimtet.

IRF report ajanga Pakistan nung Khristantem reshikangshiba metetdaksü

Washington D.C, June 06 (Agencies): Tawa US Department of State nung International Religious Freedom (IRF) Office ajanga sayaba 2020 Annual Report nung Pakistan linük nung Khristantem densema minorities reshikangshiba indang metetdaksü.

IRF report nungji Pakistan nung Tsüngrem mezüngmeshiba ozüng kübok Khristantem nem tai tonglokja tepuokdak ayuba indang shia lir; iba ken o nung aija alir 35 nembo tasüba temerenshi obendang agütsü.

Pakistan nung Tsüngrem mezüngmeshiba ken o nung tai tonglokja nisung 82 tepuokdak lir aser 2019 küm nunga parnok 29 nem tasüba temerenshi obendang agüja liasü.

1987 küm linük nung Tsüngrem mezüngmeshiba ozüngtem yangluba sülen maneni item ozüng nung Arrla 295-B aser 295-C na bendenloksemogo.

1987 küm nungi tenzuka 2017 küm tashi nung Pakistan nung Tsüngrem mezüngmeshiba ken o nung nisung 1,534 nem tai tonglokja liasü, aser iba nungjagi nisung 829 (shilem 54) bo Khristan densema minorities lir.

Pakistan nung Khristan nütsüng shilem 1.6 dang lir ajisüaka iba ozüng kübok Khristan 238 (shilem 15.5) nem tai tongloksübaji kanga tali.

IRF report nungsa Pakistan nung mapa bushir Khristantem bendanga züngshiba indang metetdakja lir. Pakistan nung tamangba yimsü nung ajemdaker nisung bendanga

züngshiba ajanga Khristantem mapa maangka junga mangur, ibayongji linük nung lenmang merükertem densema sanitation mapa inyaker shilem 80-90 bo Khristantem lir.

IRF office ajanga ashiba agi, Khristan ana- Kamran Sandhu aser Nauman Aslam nati Gujranwala Electric Power Company (GEPCO) nung minorities atema lezmüksüba menden nungi mapa bushia tenüng agütsü; Khristan anapronglai recruitment tatidang aser interviews naprongla nung takok angu saka assistant manager-i tena Khristan asübayong mapa magütsü.

Ibaji anema tenati court nung ken o agütsüba sülen ang GEPCO-i Khristan ana nem mapa agüjang ta tuyu saka mapa nung maniok.

Tan hopta Congo linük nung Khristan 70 tashi tepsetogo

June 06, 2021: IS den sendaktepa aliba kiralongrar telok - Allied Democratic Forces (ADF)-i tan hopta anüdoklen Congo linük nung Khristan 70 tepsetogo, ta International Christian Concern (ICC)-i osang ajanga metetdaksü.

June 2 nü ADF kiralongrartemi Ituri province nung nisung 11 tepset. Anogo ishika tejaklena ADF teloki Ituri province kübok yim ana

amakba mapang nung nisung 50 dak tema tepseta liasü.


"Iba camp nung ki 84 rongdoktsü aser Boga nunga store ti rongdoktsüogo. Tetsür pezü densema yimdaklirtem aika puer ao," ta osangbener kati metetdaksü.

Congo nung nütsüng shilem 85-90 bo Khristantem lir, ajisüaka linük nung Islamic kiralongrartemi mapang shia timtem agüja Khristan jenti tepseter.

Alima nung Khristantem tamajungba reshikangshiba linük 50 rongnung Congo linük ya jenjang 40 buba nung lir (2021 Open Doors World Watch List for Christian persecution).

"Islam yimsü ulutsü nükjidong nung Islamic kiralongrartemi Khristan nütsüng timba aliba linük nung kiralongra mapa inyaker," ta Open Doors otongdar, Illia Djadi-i metetdaksü.

Katsina State nung putir ana puer aoba sülen ka tepset aser ka chiok



Putir Alphonsus Bello aser Joe Keke na noksa nung angur.

June 06, 2021: May 20 nü Katsina state nung aliba St. Vincent Ferrer Arogo nung putir Joe Keke aser putir Alphonsus Bello na puer ao; Bello bo tepset saka Keke bo chiokogo, ta June 3 nü Arogoi sangdong ka ajanga metetdaksü.

Putir ana puer aoba sülen anogo ka dang lirbo putir, Bello tasü mang angu.

Arrshi küm 75 putir, Keke chiokba sülen tang medical treatment agidar, ta Arogo communications Director, Chris Omotosho-i metetdaksü.

Catholic Secretariat of Nigeria nung national social communications director, Mike Umoh-i, putir Bello tasü mang alu ka nung anguba sülen June 1 nü ali nung remtsüogo, ta metetdaksü.

Kaduna State nung tongti putir, Matthew Ndagoso-i Nigeria nung Muhammadu Buhari-i aniba sorkar dang mejangba nungi saaktsüla aser yimsü alia amangertem,

auertem, nisung apurtem aser kiralongrartem anema inyatsüla, ta takhangba agütsü.

Osang angazükba agi, putir puer aoertemi tamasabo putir chioktsü atema dollar sen 242,000 akhang aser tesüsa sen 121,000 agüjang, ta takhangba agütsü.

May 11 nüa Nigeria kübok Onitsha aser Owerri province na nung Khristan lenirtemi sorkar dang linük nung nüburtem kümzüksü atema rongdak süa inyaksüla, ta takhangba agüja liasü.

2015 küm June ita nungi tenzuka tanü tashi nung Islamic kiralongrartemi Nigeria nung Khristan

12,000 dak tema tepsetogo. Linük nung putirtem aser Khristan lenirtertem puer aoba sülen parnok chioktsü atema sen akhangba tatalokba kanga bulua kümogo.

May 17, 2021 nüa Kaduna Arogo nung putir ka densema Khristan 10 puer aoba sülen parnok 8 bo tepset.


OLONG PAITEP # 5836

	1			2	3				
4			5						6
					7				
	8								
	9			10			11		
					12			13	
14									
					15				
		16							

TIPIEN		LANGTSÜNGLEN	
2. Sü jeplok	- (4)	1. _____ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _____ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

OLONG PAITEP # 5835 TELANGZÜBA

TIPIEN :	LANGTSÜNGLEN :
1.Lemsa, 3. Osang, 5. Mezüng,	1. Lamem, 2. Sangken, 3. Omen,
6. Agi, 7. Süra, 8. Tebutem,	4. Asüküm, 7. Sendong, 8. Tejang,
9. Amen, 12. Odi, 13. Asayar,	10. Tanga, 11. Tazü.
14. Angsü, 15. Agima.	



TANÜBO NAI LANGZÜANG

Q. Tawa osang balala ajanga nung sangoktsüba 'AmbiTag' ya kechi?
 A.Temperature logger B.Cold storage
 C.GI tag D.Disinfectant
 _____ (Taruba adok nung onoki langzüsü)
YASHI ADOK TELANGZÜBA : CSO

AO OSHI ANGAZÜKDAK:
TANÜ ANGAZÜKTSÜBA OJANG

Jepzük
 (v) bener ooya lia tom nung sotba (grab)
 * Azüi shimelang ka bener oa aliba ni' jepzük.

Jetta
 (v) yakta (quickly)
 * Paibo saru ajak **jetta** agütsür.



NAI-A YA METETTER MA?

TZÜMEKÜTLI (ISLAND) TIMTIBA ALIBA LINÜKTEM:

LINÜK	ASETKONG	LINÜK	ASETKONG
1 Sweden	267,570	17 Estonia	1,520
2 Norway	239,057	18 Thailand	1,430
3 Finland	178,947	19 Denmark	1,419
4 Canada	52,455	20 Papua New Guinea	1,400
5 United States	18,617	21 Saudi Arabia	1,285
6 Indonesia	17,504	22 Croatia	1,246
7 Australia	8,222	23 India	1,208
8 Philippines	7,641	24 Maldives	1,196
9 Japan	6,852	25 Marshall Islands	1,156
10 Chile	5,000	26 United Kingdom	1,000
11 China	5,000	27 Burma	1,000
12 South Korea	4,400	28 Solomon Islands	900
13 Cuba	4,195	29 Malaysia	878
14 Vietnam	4,000	30 Greenland	800
15 North Korea	3,579	31 Falkland Islands	778
16 Greece	3,054	32 United Arab Emirates	700

(Maneni asüng adok nung...)

SUDOKU # 5878

	2		6		1	8			
4	6		2		8	3			
8	5		3	7	1	4		2	
			4		2	7	3		
6		2	1	3	5			4	
		8	7		9			1	
	3			1		2	7		
	1	6	8						
2					3			5	

TELANGZUBA # 5877

	6	2	9	5	1	7	8	4	3
1	5	8	9	3	4	6	2	7	
3	4	7	8	2	6	1	9	5	
9	3	4	7	6	2	5	1	8	
2	8	1	3	5	9	4	7	6	
7	6	5	1	4	8	2	3	9	
4	9	3	2	8	5	7	6	1	
5	7	2	6	9	1	3	8	4	
8	1	6	4	7	3	9	5	2	

OJANG LUTEP # 5422

IPE :
 ADNG :
 AGZÜKJANTSÜ :
 EPDBUSHITANG :
 ENKH :
 ENBKHO :
 ETMEMETI :
 AKAJ :
 LOEMTSNGJÜSA :
 ÜMAKER :

OJANG LUTEP TELANGZÜBA # 5421

TEMOATSÜ AGI TENÜK MASÜNGBA MESÜRA TIMTEM
 TILAKA MAREMBA SHISATSÜ AZÜOKANG

TAN HOPTA ATEMA - KOMA SÜLA ?

Q. Center government nungi Nagaland atema Covid-19 tongpang nung amshitsü yokba sen ajak yimsüsür aser tulersemi chia-adok nunga koma süla ?



June 06, 2021 nü Gandhi Medical College, Bhopal nung Junior doctor temi parnok nem itasen tujang ta takhangba agüja mapa nungi anenba shidi agütsüba sülen longkak aitba noksa nung angur. Madhya Pradesh High Court-i state tesem ajaklen junior doctor temi longkak aitba ya ozüng alema lir, ta shia ghonda 24 tsüngda mapa inyakang ta tuyuogo.

State trok nung Petrol litre ka nung sen 100 dak tema jungogo

New Delhi, Aami/June 06 (Agencies): India linük nung petrol aser diesel totzü jenjang maneni atuba sülen state trok nungbo petrol litre ka nung sen 100 dak tema jungogo.

Amongnü linük yimtiba, Delhi nunga tang mezüng petrol litre ka nung sen 95 aser diesel litre ka nung sen 86 jungogo.

Amongnü linük nung petrol litre ka nung poisa 21 aser diesel litre ka nung poisa 20 atu.

State pongu nung assembly election agiba mapang nung totzü jenjang metui liasü, saka May 3 nü election osang sangdongba sülen anogo ka

dang lirbo May 4 nungi totzü jenjang atur.

May 4 nungi tenzüka tang tashi nung gari totzü jenjang 20 ben tuogo aser tang union territories/states 6 nungbo petrol litre ka nung sen 100 dak tema jungogo; item states ji - Rajasthan, Madhya Pradesh, Maharashtra, Andhra Pradesh, Telangana aser Ladakh lir.

Amongnü totzü jenjang atuba sülen Delhi nung petrol litre ka nung sen 95.09 aser diesel litre ka nung sen 86.01 kümogo.

State shia nung VAT ama local tax balala nung ajemdaker

totzü jenjang balala.

Linük nung petrol aser diesel totzü nung VAT saru timba agiba state ji Rajasthan lir, iba sülen Madhya Pradesh, Maharashtra, Andhra Pradesh aser Telangana state tem lir.

May 29 nü Mumbai nunga petrol litre ka nung sen 100 tema ajung, aser tang iba yimti nung petrol litre ka nung sen 101.3 aser diesel litre ka nung sen 93.35 kümogo.

May 4 nungi tenzüka tanü tashi nung totzü jenjang 20 ben atu aser iba mapang nung petrol litre nung sen 4.69 aser diesel litre nung sen 5.28 tuogo.

Covid wave tanabuba ajanga aluyimba nung mekongshitsü: Niti Aayog

New Delhi, June 06 (Agencies): Tang India nung coronavirus wave tanabuba anema raraba mapang Amongnü Niti Aayog Member (Agriculture), Ramesh Chand-i, coronavirus wave tanabuba ajanga linük nung aluyimba sector mekongshitsü, kechiyong yimtsüngtem nung May ita nung ang iba wara kanga bulua liasü, ta metetdaksü.

Interview a nung jembidang Chand-i, "May ita nung yimtsüngtem nung coronavirus

prok tenzüka liasü aser iba mapang nung aluyimba sector kangabo mekongshi," ta metetdaksü.

"Iba ita (May) ya lemluwa mongpu tiyong lir aser iba mapang nung metsüh meproker. Iba mapang nung aonsotsü kar dak alaka alu marüher," ta pai ashi.

Aluyimba maparen ya timba March mesüra April ita tom tashi inyaker, iba sülenbo alu mapa wadang akümer, aser tzüngluruwa mongpu tenzüka sülen ang alu wadang tenzüker,

ta pai ashi.

"Anungji May ita nungi June tom tashi alu nung inyaker nübo peria manguyonga ibaji ajanga aluyimba nung mekongshitsü, ta nibo bilemer," ta paisa metetdaksü.

Aluyimba sector ainba dak sendakba nung tasüngdangba ka langzüdang Chand-i, 2021-22 kümsük nung aluyimba sector ainba shilem 3 dak tema asütsü, ta ashi.

Taoba kümsük nung aluyimba sector ainba shilem 3.6 dak tema liasü.

India nung ano nisung lakh 1.14 dak Covid putet aser 2,677 asü

New Delhi, Aami/June 06, 2021 (Agencies): Tesüiba anogo ka tsüngda India linük nung ano maneni nisung 1,14,460 dak coronavirus tashidak putetogo, ta Amongnü Union health & family welfare ministry-i metetdaksü.

Tesüiba ita ana tsüngda anogo shia coronavirus case tajemtiba putetbaji tesüiba ghonda 24 tsüngda putetba liasü; tang tashi nung linük nung nisung ajak agi 2,88,09,339 dak coronavirus tashidak putetogo, ta Health Ministry-i metetdaksü.

Tesüiba ghonda 24 nungsa India nung coronavirus agi shiranger 2,677 süogo aser linük nung iba tashidak agi asür ajak agibo 3,46,759 jungogo.

Tanü agi anogo 24buba anogo shia coronavirus tashidak putetba dang nungibo shiranger anepba timba, aser tang tashi nung shiranger shilem 93.67 anepogo.

Tang tashi nung coronavirus

agi shiranger 2,69,84,781 anepogo aser iba nungji tesüiba ghonda 24 tsüngda shiranger 1,89,232 anepba densema lir.

Anogo shia positive putetba shilem 5.62 dang kümogo aser tesüiba anogo 13 tashi positive putetba shilem 10 den tajemba lir.

Tang linük nung iba tashidak agi teshirangdakpur 14,77,799 dang kümogo aser ibaji coronavirus caseload nungi shilem 5.13 dang lir.

Amongnü Indian Council of Medical Research (ICMR)-i, Honibarnü (June 5, 2021) samples 20,36,311 tendangogo aser ibaji densemabo linük nung samples ajak agi 36,47,46,522 tendangogo, ta metetdaksü.

India nung tang tashi nung coronavirus vaccine dose ajak agi 23,13,22,417 agütsüogo.

Coronavirus vaccine aser dose timba agütsüba state ji Maharashtra lir (dose 2,40,22,331), iba sülen Uttar Pradesh, Gujarat aser Rajasthan state tem lir.



June 06, 2021 nü Kolkata nung South Point School nung class XII kaketshirtem coronavirus vaccine agitsü atema atatepba noksa nung angur.

Ki tonga ration bener otsüba scheme melatsüla: Arvind Kejriwal

New Delhi, June 06 (Agencies): Delhi sorkari ki tonga ration bener otsüba scheme tenzüksü lia Centre sorkari nokdang, ta aija Amongnü Delhi Chief Minister, Arvind Kejriwal-i Ato kilonser, Narendra Modi dang iba scheme tenzüksü atema temelaba agüjang, ta mepishi.

New Delhi nung osangbenertem senden ka nung jembidang Kejriwal-i, "Pizza, burgers, smartphones aser süoshitem ki tonga bener otsütetra kechiba ration bo ki tonga bener moutetsü? Iba ama scheme ya linük tesem ajungalen benoka inyaktsüla," ta ashi.

Paisa, ration shops nung nisung nungtepdang coronavirus prokba nokdangtsü atema iba scheme ya tongtibang asütsü, ta ashi.

Coronavirus case ajema akümba ajanga states aser Union Territories aika nung shilem lemsar Covid tenokdangbatem agientsü sentong lia Kejriwal-i iba o ya jembio.

Coronavirus case ajemba nung ajemdaker Delhi sorkaria asüng (June 7) nungi tenzüka tenokdangba kar agientsü sangdongogo.

"Tang coronavirus wara aliba mapang nung Centre sorkari West Bengal Chief Minister Mamata Banerjee, Maharashtra,

Delhi aser Jharkhand sorkartem, aluyimertem aser Lakhsadweep nüburtem den mazüngi rarar," ta Kejriwal-i aitsü.

"Centre sorkari ajak den raratepba agi nüburtem mepelar. Asenok yamai dang raratepra asenoki kodaser coronavirus tongbang koktettsü?" ta pai asüngdang.

"Delivery scheme atema Delhi sorkari Centre dang temelaba meshitsü menüngdak, ajisüaka mangatettep madoktsü atema onoki Centre dang temelaba agüjang ta ponguben tashi asüngdangogo," ta AAP tongti lenirisa metetdaksü.

Iba scheme atema Delhi sorkari temelaba memeshi ta Centre-ibo shiogo.

Delhi LG-ia iba scheme indang court nung ken o benoka lir, ta shia iba scheme indang file magizük, ta chief minister office sangdong ka nung metetdaksü.

Yashi Delhi Food Minister, Imran Hussain-i, "Tang aliba ozüngtem kübok iba ama scheme tenzüksü atema temelaba meshitsü menüngdak. Tang court nung ken o ka benoka aliba dak sendakba nung iba scheme metenzüktsü atema court- tuyua mali. Iba scheme nokdangba ya yimtenren tsütsü inyakba lir," ta metetdaksü.



June 06, 2021 nü Hitex Exhibition Grounds, Madhapur nung Covid vaccination drive mapang coronavirus vaccine agiba noksa nung angur. Vaccination drive ya Cyberabad Police, SCSC aser Medicover Hospitals-i senteper ayongzük.

Iraq nung US sepaitem aliba tesem nung drones ana kazüka yok

Baghdad, Aami/June 6 (Agencies): US sepaitem amenoka aliba base ka kolak nung drone ana raksatsüogo, ta Iraq army-i Deobarnü metetdaksü. Iba base ya ita ka tejakdang drone agi maka liasü. Ain al-Assad base kolak nung yimzua aliba drone tem khazüka yoksü atema US military indang C-RAM defence system activate süja liasü, ta Iraqi military-i ashi.

Iba masüdag ghonda ishika jelia Baghdad airport kolak nung rocket ka kazüka yok, saka nisung asüba mesera yiruba kecha mali, ta Iraq nung US-i aniba military coalition otongdar Colonel Wayne Marotto-i ashi.

Islamic State jihadist den raratsü atema sepaitem ya Iraq-i yok. Islamic State jihadist tem anema rara ya kokadokogo ta Baghdad-i 2017 küm tatemlen sangdonga liasü.

Iraq nung tang US sepai 2,500 lir aser coalition troop ajak senteper 3,500 lir.

Iraq nung US nunger sepaitem amenoka aliba tesemtem mapangshia amakba ya Iran den sendaktepa aliba Iraq nunger telungpurtem mapa

lir ta US-i tai tonglokja arudar. Taküm küm Iraq nung US nung sendaka aliba tesem 39 ben tashi makogo.

Telungpurtemi timba gari convoy tem bomb agi amak aser iba den rocket 14 agi US nungertem makogo. Iba lendong bener arutsüba karbo pro-Iran factions-i parnok mapa ta nangzükogo, shirnoki US sepaitem ajak anintsü atema Washington nongshitsü merangdangdar.

Iraq nung Western diplomats aser military ketdangsürtem atema iba amala lendong ya US sepaitem atema dang tetsübutüsü masü saka iba ajanga IS anema rara nung tetsükdaksü adoker.

"Item lendong atalokbatem ya minprong lir. Parnoki jihadists tem dak alaka shinga nema teyari magütsür, kechiyong parnok base tem amakba shia ketdangsürtem parnok kechi mapa nung rangloker inyaker, aji toktsütsüsa akümer aser sepaitem kümzuka ayutsü atema-ang inyaker," ta source kati ashi.

US anema Iran den sendaka aliba telungpurtemi drone amshiba ya tasa tasen ka lir.

Northern Afghanistan nung bomb agi nisung 11 pokset

Qala-e-Naw, Aami/June 06 (Agencies): Northern Afghanistan nung gari kati ali nung rema aliba bomb (land mine) ka nung menünga apokba lendong nung civilian 11 asü, ta sorkari Deobarnü ashi aser lenmang tezülen bomb rema yutsüba atema Taliban dak tai tongloktsü.

Linük north tsütsü Badgis province indang governor Husamudim Shams-i ashiba agi, Honibarnü lendong nung asürtem rongnung tanur asem dena lir.

Nisung 11 ya Qala-e-Naw yimti leni aoba mapang iba lendong ya ajuru, ta pai ashi.

Telok katia iba lendong agütsüba tenüng agia mali.

Afghan yimjung maparen, Afghanistan nung aliba diplomats aser humanitarian agency atema inyakba nisungtem nem security agütsütsü atema Taliban lenir aser United Nations ketdangsürtem Qatar nung Honibarnü ajuruteptsü ghonda ishika lia iba lendong ya ataloka liasü.

Taliban indang political office nung deputy head, Sher Mohammad Abbas Stanekzai-i Afghan yimjung maparen atema bendanga agütsür inyaker ta UN ketdangsürtem den senden amenba mapang nenshia shia liasü, ta Taliban odongtar kati Twitter nung sangdong ka agütsü.

Taliban lenirtemi Afghanistan nung amenoka

aliba UN agencies staff aser diplomats tem nem timtem magütsütsü nangzükaka, province aika amokbanga yimsü asütsü mechi sorkar meyong sepai aser civilian anema azüdokshi mapa inyaker, ta Afghan ketdangsürtemi Taliban aitsür.

Hokulbar nung UN Security Council nung takotet telok kati kakat tapak 22 osang ka agütsüba mapang, tawa security forces, obendanger, sorkar ketdangsür, civil society activist aser osangbener dak tenük yoker lendong agütsüba timba Taliban mapa lir, ta shia liasü.

Sorkar tashi ajemdaksütsü aser civil society amokmerentsü nükjidong nung item lendong ya agütsür amai ajiteter, ta mongintem ashi.

September 11 (2001 küm United States nung lendong agütsüba anogo) tashinung US aser NATO sepaitem Afghanistan nungi anizüker aoba ajanga Afghan sepaitemi tayimtsü nungi operation agiba ajemtsü, drones, radar aser surveillance tashi tilaba akumtsü, sepaitem senzüsempogba aser prangbong tulutem ajemtsü aser training agütsüba nunga timtem ajurutsü, ta parnok ashi.

Yimjung ken o jembiaka 2021 küm tenzüker mezüng ita asem tsüngta sorkar meyong sepai aser Taliban tsüngta raraba mapang Afghan nunger civilian 1,800 jungnüa takum samaogo.

Nigeria nung kiset shiruru auyartemi tepseter 88 jungogo

Abuja, Aami/June 6 (Agencies): Northwest Nigeria kübok Kebbi state nungi sepaitemi Deobarnü AFP dang, Brehostibarnü nashi chang ayuartemi yimtsüng tenet amakba nung asür 88 jungogo, ta metetdaksü.

Iba tesem nung küm aiaka kin o kin tsüngda mangatetep adoka aruogo aser tawa telok kar kanga mazüokteti kümogo aser parnok rakzükkrakdamba den nisung tepseter aser sen meleni nisung pur aoer.

"Mezüngbuba tasü mang 66 dang ngutet saka ano tasü mang 22 ngutetogo," ta Kebbi state police otongdar Nafiu Abubakar-i ashiba den tasü mangtem maneni bushidar, ta ashi.

Motorcycle nung mener nisung telok kati brehostibarnü Danko-Wasagu district kübok yimtsüng tenet amak, ta Abubakar-i ashi.

Item nisungtem yagi Koro, Kimpi, Gaya, Dimi, Zutu, Rafin Gora aser Iguenge yimtsüng maka liasü, ta paisa ashi.

Iba lendong atalokba sülen nisung aika jenshiogo aser Deobarnü tashi nung aika tasü asü takümar mejangjai liasü.

"Nisungtem maneni bushitepdar aser ano tasü mang aika ngutetsü akok. Anungji asürtem ano tejangja memetet," ta Abubakar-i ashi.

Iba amala lendong nungi jenboa toktsütsü atema iba tesemi police yokogo, ta pai ashi.

Nisung tepsetertem ya kidanger state Zamfara mesera Niger nungi asütsü ta amanger kong ozüng raksartem parnok tesep amenoka lir.

April ita Sakaba district kübok kiset shirurtem auyatsü atema yimtsüng ka amakba mapang police teku khaset, ta Abubakar-i iba mapang nung AFP dang ashi.

Northwest aser central Nigeria nung ozüng raksar telok aika lir, shirnoki yimtsüngtem amaker aser yimdaklirtem merenshiba den parnok ki tem rongtoktsür.

Item teloktem ya Zamfara, Katsina, Kaduna aser Niger

states tsüngda aliba Rugu arem min nung jenoka lir.

Nigeria indang security forces, shirnok northeast nung küm aika jihadist telungpurtem den rara arudar, parnok kanga timtem nung lir.

Northwest nung amenoka aliba ozüng raksar teloktem yagi tawa school tem amaker aser tsürapur aser ketdangsürtem dang sen meshitsü atema kaketshirtem aika pua bener aoer.

December ita nungi tang tashi nung kaketshir 700 dak tema pua benerogo. Item school tem ya timba kinük nung amenoka lir, kong security tashi mait.

Niger state nung ketdangsürtemi ashiba agi, taoba hopta tatemi Islamic seminary ka nungi kaketshir 136 pua bener aoba meyipa anir aotsü atema sensaksemdar.

School amakertemi tanur 11 bo chiokogo, shirnok kanga tanur aser len talangka jaja motetei liasü, ta ketdangsürtemi ashi.

Burkina Faso azüdokshi nung nisung asür 132 jungogo

Ouagadougou, Aami/June 06 (Agencies): Burkina Faso linük north tsütsü telungpur temi nisung 132 tepsetogo, ta sorkari ashi, aser United Nations tekolakbai iba azüdokshi ya aija linük balala dang azüdokshi mapa inyaker anema nokdaksü ayongzuka liasü.

Lendong agütsürtemi Niger den arrtsüa aliba Yagha province kübok Solhan yimtsüngi Hokulbar aonung arua yangji alirtem tepset. Parnoki nisung aliba ki aser shishilempaba tesemtem mi agi rongdoktsü, ta sorkari Honibarnü sangdong ka nung ashi.

Asürtem rongnung tanur tenet dena lir.

Iba lendong nung yimdaklir 40 yirutsü, ta sorkar indang odongtar Ousseni Tamboura-i osangbener dang ashi.

Tir Roch Marc Christian Kabore-i nisung tepsetba ya aitsü aser Burkinabe nüburtem lungjemer item tashi anema nokdaksüla, ta ayongzük.

Tang tashi telok katia iba

azüdokshi indang tenüng agia mali.

Hokulbar aonung azüdokshiba ya Burkina Faso nung küm aika tsüngta azüdokshiba lendong rongnung tulutiba alitsü.

2015 küm nungi iba West Africa linük nung al-Qaeda aser ISIL (SISI) den sendaktepa aliba teloktemi mapang shia lendong agütsüba anema raratsü mokoki arur.

Iba amala lendong ya mezüngbo linük north tsütsü Mali den arrtsü anasa tenzüka liasü, aser tangbo danga region tem, talisa linük anüdoklen nunga ataloka alima nung meimchir asoshi timtem tamajungtiba ka kumogo.

Mapang talangka rarayonga aruba mechi Burkina Faso nung nisung million 1.2 shi pei ki yutsür tesem balala nung prokshia lir, kong French sepai aser danga linük aser region nungi sepaitem meyirijang aika liaka army aser civilian dak amakba tali akumer.

Burkina Faso nung azüdokshiba atema UN Secretary-General Antonio Guterres-i sangdong ka nung aitsü aser UN ajanga linük nungitsü nangzük.

Guterres-i iba lendong aitsü aser linük balala dang züngsem linük yaria item mapa tamajung inyaker den raratsü ayongzük.

Burkina Faso nung ghonda 72 mangyimtsü sangdonga lir.

Solhan nung lendong agütsürtemi anepbongi 2:00 ako (par mapang) meta aru mitkar busemba Volunteers for the Defence of the Motherland (VDP) indang tesem ka amak aser iba sülen nisung aliba ki maka liasü, ta osang ajanga ashir.

Burkina Faso nung telungpur telok balala den raratsü asoshi tashimait mitkartem yaritsü atema 2019 küm December ita VDP ya tentet, ajisüaka parnok 200 dak tema süogo, ta ashir. VDP züngsem nem hopta ana mitkar training agütsüba sülen sepaitem den kasa mapa lemzüktsür.



Port-au-Prince, Haiti nung aliba street market ka nung nisung kati oset bener aoba noksa nung angur. Nütsüng yongsük million 11 dak timba aliba Haiti linük nungya küm ka dak tema health ketdangsürtem mangmangdakja COVID-19 nungi jenbua aru aser nisung kata mozü magi, saka tangbo iba linük nung coronavirus agi nisung menepba aser asüba kanga sashia kumogo.



2021 Alima Lipukum Anogo June 5 nu Dimapur Ao Baptist Arogo kubok aliba Lungmen (Burma Camp) fellowship tenla ki temeket nung sannuker Rev.L.Lima Jamiri anir tzu mopong merukteta alitsu atema arogo nung lenirtemi sungdong atemba noksa nung angur.

Sunny-i timtemer nem chiyongtsü lema agütsü

Mumbai, Aami/June 06, 2021 (Agencies): Deobarnü, Bollywood star Sunny Leone aser la kinungbo, Daniel Weber nati nungdabapur aser timtemer nem chiyongtsü lema agüja tenati meimchir atema aria bilemtsüba mapa tajung ajanga sayuogo.

Tang ama Covid-19 tensa tamajungdang, apuani yagi lenmang balala ajanga tenati akokba yari nungdabapur aser timtemer tem yaria aruba mapang ka nung, Deobar anogo tenati truck ka nung chiyongtsü bener ayazük aser Mumbai yimdong nung nungdabapur nem item chiyongtsü lema senzü.

Timtemer talisa tanurtem aser talidak ki malirtem nem actress yagi pungdang nung inoker aliba chiyongtsütem lema agütsüba noksa tangoka liasü.

Truck nung lai chiyongtsü tem lema aoba mapang, nisung jenti chiyongtsü agizüksü asoshi truck meküta adenshi. Kasa mapang, fans kari la den külemi noksa tangokogo.

Taküm küm tetenzüklen, Sunny-i Delhi nung tanga tesem nungi arur ayanger 10,000 chiyongdaksütsü asoshi NGO telok ka den teka amtepba mapang, iba osang prokshia liasü. Item ayanger chiyongdaksütsü atema lai daal

aser chi mesüra 'khichdi' den külemi süngjanglijang tem agütsü.

Iba maparen dak sendakba nung jembiba mapang, Sunny-i, "Asenok ajak timtem tuluka ajangshidaki, saka ajak longjemer kati ka atema aria bilemja aser temeim lia inyak nungang asenoki iba timtem koktetsü," ta ashi.

Maneni, acting maparen tsütsü Sunny-i la indang taruba psychological thriller film - 'Shero' tetangokdak lir. Iba film ya Sreejith Vijayan-i direct südar aser film ya Tamil, Hindi, Telugu den Malayalam oshi nung sayatsü.

NSCN/GPRN ajanga asükhu lemsateper

Dimapur, Aami/June 06, 2021 (TYO): Honibarnü (05.06.2021) Moba Brigade, Naga Army indang Lance Corporal Isaac Saka, Army no. 44331/15 anojungi asüba osang angashia Government of the People's Republic of Nagalim (GPRN) mang ayimer, ta MIP, NSCN/GPRN sangdong ka ajanga metetdaksü.

Isaac ya Khurmi Region kübok Yamolching village nungi lir aser pa ya Naga national service nung 2016

küm January 26 nü aden.


Pa tasünü tashi Naga linük asoshi bendanga agüja aser tasüita tenzükogo. Naga nunger asoshi pai bendanga agütsür inyakba atema pa tenüng teti Naga nunger puti otsü nung alitsü aser Naga linük asoshi pai bendanga agütsür inyakba ya nübur ajak molung nung teti alitsü, ta sangdong ajanga ashi.

Naga linük asoshi pai bendanga agüja tenzükba bilemteta, June 05, 2021 nü

Adjutant General, Naga Army-i pa nem (posthumously) Corporal rank agütsüogo.

GPRN-isa asür (L) Corporal Isaac Saka-i toktsür aoba kinungertem den mangyim tejashi lemsateper. Iba tako marok koktetsüsa Tsüngremi parnok molung nung tesünap agüjangma.

Tsüngremi pa tanela teti tesünap nung anisüngzükdakjang ta onoki sarasademtsür, ta sangdong ajanga ashi.



Kohima, Aami/June 06, 2021: World Environment Day anogomung nungtem nung, Spear Corps indang 'The NAGA Terriers'-i "Ecosystem Restoration" omen nung ajemdaker Zakhama, Meluri, Mokochung, Mon, Tuensang, Tizit aser Rangapahar tesem nung 'Water Conservation aser Plantation Drive' sentong ayongzüka agiogo. Asen meküta aliba libajen kümzüka ayutsü temolungteba yur Troops yagi item tesem nung volunteer tem teyari agia süngdong 10500 tashi temoktsügo, ta sangdong ka ajanga metetdaksü.

MULUNGNEŃ O



TASOBA :
18.11.1962

TASÜBA :
16.05.2021

Onoki teti meima aliba **Asür L. Moameren Imsong** (Merangkong) shiranga aliba mapang nung akümüli tempangba tashi shirnokisa sarasadem, nübo, shisatsü aser rongsen agi yaritepa aruogo, nenok temeim mapa agi ozü mulungzürep süneptsüba asoshi kanga pelaba lemsateper.

Tsüngremi nenok ajak moajang ta ozü tamang sarasadem.

~ Temeim Kinungtsü, Tsürabur aser Kinungertem.

MULUNGNEŃ O



ASO :
22-01-1957

ASÜ :
03-06-2021

Onoki teti meima aliba obala, **Asür L. Bendangmongba Imchen** (Waromung), shirang yipten nung aliba mapang nungi akümüli wadang tembangba anogo tashi nung kija, kibong, kiyonger, Arogo, yimden aser lokti balala, shirnokisa sarasadem, nübu aser rongsen ajang ozü den yaritepogo, nenok ajak dang kanga pelaba lemsateper.

Nenok mapa tajung asoshi Tsüngremi maneni moajangma.

Temeim kinungtsü, chirnur, semchir aser anük-apangtem.

Hrithik Roshan-i sen lakh 20 tenla agütsü



New Delhi, Aami/June 06, 2021 (Agencies): Anogoshia ayanger artist tem, shirnok coronavirus tanabuba wave ajang rokongdar, parnok nem teyari agütsütsü asoshi, Superstar Hrithik Roshan-i 'Cine and TV Artistes' Association' (CINTAA) nung sen lakh 20 tenla agütsüogo.

CINTAA General Secretary Amit Behl-i ashiba agi, anogoshia ayanger qualified artist tem, shirnok film, TV aser web-show balala nung inyaker, tang lockdown ajang parnok sen arulen lenmang menguteti kanga timtemdar.

Behl-i ashiba agi, iba tenla nungi shilem ka indang indanga artist 2000 indang account-i yoktsü. Kasa mapang, tanüngba senji rations kits alitsü aser vaccination drive maparen nung amshitsü sentong lir.

"Pei pei account-i indang indanga sen yoktsü asünung, züngsem 2,000 dak tema ajangzüksü. Iba dak alia, tanüngba sen ya ration kits


alitsü aser vaccination drive sentong ayongzüksü asoshi amshitsü," ta pai ashi.

Behl-isa, tang tenla agütsüba dak alaka, taoba küm-a (2020) Roshan-i lakh 25 shi tenla agütsüogo. Roshan dak alia, actor Vicky Kaushal-i sen lakh 2.5 lakh aser Flora Saini-i sen 25,000 tenla agütsü. TV star Sakshi Tanwar-i tenla agüja lir.

Iba tentet nung India aser alima ajungalen züngsem 10,000 dena lir. Hrithik indang acting maparen tsütsü reprangdangra, nungtugu English series "The Night Manager" nung shilem agidaksütsü asoshi pa anisemogo.

Iba Indian version Project nung Hrithik-i Jonathan Pine character ama shilem agitsü, koba 2016 küm original series nung Tom Hiddleston-i Pine shilem agia lir. Iba limited series ya John Le Carre ajang 1993 adokba novel nung ajemdaker yanglua liasü. India indang project yakta tangok tenzüksü.

Sushil anema 'Scientific Evidence' benoktsü: Delhi Police



Sushil Kumar

New Delhi, Aami/June 6 (Agencies): Delhi Police-i Deobarnü sangdong ka ajanga, Chhatrasal Stadium nung nisung tepsetba ken o nung Sushil Kumar aibelen aliba kuli agütsütsü atema 'scientific evidence' amshitsü ta shiogo. Iba tatalokba nung lanur wrestler ka zükset.

Delhi Police Commissioner S N Srivastava-i Deobarnü senden ka nung ashiba agi, police-i 'scientific evidence' dak ajemdaker chargesheet ka benoktsü, kong Sushil Kumar'er kidang amenoka aliba DVR mesera CCTV footage, mobile clip, süoshi nung azü melanga aliba aser fingerprints densema lir.

Iba senden nung Deputy

tatsüka lir asü. Kumar aser pa nem teyari agütsüsang Ajay, May 23 nü Mundka tesem nung apu.

Police temi iba ken o nung aija alirtem rongnung Sushil Kumar ya tongtiba ta sangdongogo aser ashiba agi, electronic kuli ajanga pa aser pa nem teyari agütsüsang nati Dhankar dak sung agi azükba ngutetogo. Social media nung prokshiba video nung Kumar aser pa nem teyari agütsürtemi nisung ka dak sung agi azükba nguogo.

Taoba hopta Delhi nung court kati, Sushil Kumar police ket nung ano mapa tatsüka ayutsü atema Crime Branch-i mepeshiba magizük. Delhi Police Crime Branch-i Sushil Kumar parnok ket nung anogo ter ayu aser ano anogo asem atsülangtsüsü mepeshi. Parnoki Sushil Haridwar-i anir onüa liasü. Nisung tepsetba sülen Sushil mezüngbuba iba tesemi jena ao.

May 4-5 aonung Chhatrasal stadium nung wrestler Sagar Dhankar tepsetba ken o nung aija Delhi Police-i Sushil May 23 nü apu. Ketdangsurtemi ashiba agi, pa anogo 20 tashi jenshia senzüa liasü.

French Open: Zidansek aser Pavlyuchenkova na quarter-i iogo



Anastasia Pavlyuchenkova

Tamara Zidansek

Aami/June 6, 2021 (Agencies): Tamara Zidansek ya Slovenia tsürtem rongnungi Grand Slam ka nung quarter-finals tongteta asayaba mezüngbuba asayar kümogo. Deobarnü lai French Open tetsür kija asaya nung 7-6(4) 6-1 agi Romania tsür Sorana Cirstea koka liasü.

Court Suzanne Lenglen nung asaya tenzük mezüngbuba set nung tenapronglai game kaka break süa tenzük, saka tiebreak asayaba mapang Zidansek-i tajungba asayatet aser Cirstea-i aibelen aika mena liasü.

World number 85 Zidansek-i tang tashi nung Grand Slam asayamung ka nung danga tanabuba round aden asayadanga mali ajisüaka tena

world number one asayar Victoria Azarenka 5-7 6-3 6-2 agi koka liasü.

Pavlyuchenkova, tang agi tenetbenbuba Grand Slam quarter final nung asayatsü lir, ajisüaka lai quarter adena khen danga asayadanga mali. Lai asaya nung winner 44 nguteta liasü.

La taruba asaya Grand Slam 23 ben tashi koker alila Serena Williams mesera Kazakhstan tsür Elena Rybakina den asayatsü.

"Küm 10 sülena ni maneni tennis asayatetba atema kanga pelar. Ni point ajak atema kanga meranga asayaogo aser asaya kochtetba atema pelar," ta Pavlyuchenkova-i asaya tembangba sülen ashi.

Ni asayatsü masayatsü mejangja: Roger Federer



Aami/June 6, 2021

(Agencies): French Open nung last 16 tongteter liaka Roger Federer-i iba asayamung nung shilem magitsü atema asadangdar. Deobar anepdang Dominik Koepfer den set pezü tashi kanga toktepa asayaba sülen Federer last 16 tongtetogo.

"Ni maneni asayatsü masayatsü mejangjai kümogo," ta Federer-i ashi, shiba arishi küm 40 ajungtsü ita ana dang anunga lir. Pa Hombarnü round pezübuba nung Italy nung asayar Matteo Berrettini den asayatsü.

"Ni maneni asayatsü masyatsü telemetba ka agitsü nungdaker. Temekok majung asünung tali pressure magitsüner. Tang ya anisüngzüktsü mapang tajung," ta pai ashi.

Grand Slam 20 koker aliba asayar, shiba 2020 küm temekok anaben tashi surgery agia liasü aser taoba küm Australian Open nungi tang tashi nung asayamung

tasembuba nungang shilem agidar, pai taküm pa asoshi tongtibatibaji Wimbledon asayamung asütsü ta shiogo.

Taküm Wimbledon ya June 28 nü tenzüktsü aser pai iba asayamung tekubenbuba akoktsü asoshi merangdar.

Pa Halle nung June 14 nungi tenzüka asayatsü aliba warm-up grass court asayamung nung shilem agitsü renema lir. Iba asayamung ya French Open tembangba sülen anogo ka lir tenzüktsü.

"Asaya shia temang jenjang asadangtsüsa akümer aser tasüngnep koda saker aji asadanger aser kü temokok koba jenjang nung lir aji asadangtsüsa akümer," ta Federer-i ashi.

Honibar aonung tenzükba asaya koba Deobar anepdang tembanga liasü, iba asaya ya Court Philippe Chatrier nung terpranger medeni asayaogo, kechiyong sorkari Covid-19 curfew benoka lir.

Kevin de Bruyne Operation tila ka agi

Aami/June 6, 2021

(Agencies): Kevin De Bruyne Honibar anepdang pa tejak nung operation tilaka agiogo aser Hombarnü team nung arua adentsü, ta Belgium coach Roberto Martinez-i ashi.

"Kevin De Bruyne operation tila ka agitsü nungdaka liasü, koba tanü agiogo. Pa team den Hombarnü longjemtsü," ta Croatia den friendly ka asayatsü lia osangbenertem den sensaksemba mapang coach-i ashi.

Hopta ka tejakdang Champions League final asayaba mapang Chelsea nungi asayar Antonio Rudiger den tsüktepa sülen Manchester City nungi asayasang teni aser tenük tabelen socket rakas. "Tarutsü nung timtem madoktsü atema operation agitsü nungdaka liasü. Operation minute 20 agi. Ajak kanga junga tembangogo," ta Martinez-i ashi.

"Surgery agiba ajanga Kevin team den longjemtsü

atema kecha tetsükdakttsü madok. Iba ajanga pa takaratiba nung asayatetsü, kechiyong pa mask asemtsü menüngdaker," ta Martinez-i ashiba den June 12 nü Euro 2020 nung Belgium team mezüngbuba asaya Russia den asayaba mapang De Bruyne masayatetsü, ta ashi.

Axel Witsel, shiba January ita Achilles tendon yirur tang temang anepaluba mapang ka liaka team nung züngoksemogo, pa Croatia den Brussels nung asayatsü aliba asaya nung shilem magitet.

Kasa mapang nung midfielder, Eden Hazard-a yirur tang temang anepaluba mapang ka lir.

Hazard, shiba taoba season yiruba ajanga Real Madrid nungi junga masayateti liasü, pa Belgium team nung May 31 nü oa aden, saka tebi nung ano timtem kar lir ta ashi.

Russia den mezüng asayaba sülen world number one Belgium team Group B nung Denmark aser Finland den asayatsü.

BILEMDANGANG

"I nyak junga alidang meranga inyakang."